

Bouônjour bouonnes gens, ch'est Jean L'Maistre dé L'Êta tch'a l'pliaîsi d'vos présenter la lettre Jërriaise aniet, Sanm'di lé 15 du mais d'Févri 2025.

Preunmiéthement j'voudrais dithe tchiques mots dé célébrâtion pouor la vie dé not' grand anmîn et not' couôsîn lé Sieur David Hueûlîn tchi pâssit l'pas lé 6 du mais d'Janvyi. J'ai connu David presque toute ma vie. Preunmiéthement pa'ce qué sa grand'méthe Hueûlîn 'tait la soeu dé ma grand'méthe Lé Maistre. Et lus nom d'fil'ye 'tait Lucas. Tandis qué David 'tait presque deux ans pus vyi qu'mé j'étions au Collège Victoria ensembl'ye. I' d'vînt êcrivain bein connu et bein respecté dans la Rue ès trais Pigeons. I' 'tait hardi ordgilleux d'être un vrai Jërriais même qué sa méthe 'tait Angliaïche et en conséquenche i' r'grettait dé n'pouvait pon pâler l'Jërriais.

David 'tait acti dans plusieurs organnisâtions et charités. I' d'vînt président d' l'associâtion Jersey-Coutançais au tout c'menchement quand ou fut formée en 1984. J'mé rappelle dé plusieurs visites en Nouormandie auve li et sa fanmil'ye. Un exempl'ye 'tait eune journée dé bieu solé à l'île dé Chaussé auve un pique-nique énorme, sans doute fourni par nos anmîns Nouormands, et eune autre occâsion à pâsser eune journée à visiter lé merveilleux châté dé Balleroy à l'occâsion d'la fête des ballons, tchi spectacl'ye. David 'tait dévoué à Louise sa femme et à toute sa fanmil'ye et à tchi qué j'env'yon not' s'ympathie. J'allons tous lé mantchi ch'na ch'est bein seux.

Achteu aut'chose, av-'ou r'mèrtchi comment qu'les jours s'allouognent déjà? J'mé rappelle quand nou pliantait des patates lé 14 ou 15 du mais d'Févri à la Ville Bagot dans lé clios tchi s'appelle les Hougues, si nou 'tait bein prépathé à c'menchi bouanne heuthe lé matîn nou pouvait auve 5 plianteurs justement finni les 2 clios par chîntch'heuthe et d'mie sans lanterne.

Achteu j'voudrais prendre l'opportunité dé mentionner l'invitâtion qué j'avons r'chu dé nos couosîns Nouormands. I' sont à organniser eune fête Nouormande à Bricbé du 13 au 15 du mais d'Juîn ch't' année.

Lé preunmié jour est sustout pouor les mousses et lus pathents. I' y' étha des jeux, les anciens Nouormands, pouor les adultes et les jannes étout.

I' y' étha étout des danses traditionnelles le deuxième jour, lé Sanm'di y'étha hardi d'activités l'ouverture officielle dé la fête à 9h30 et pis j'allons vaie des expositions à tchuithe auve un chef, la musique et la chant'tie, vraiment eune journée pouor tous. Lé Dînmanche nou-s'étha des histouaïthe, d'la musique, des danses et la visite au châté.

Entouor les choses en Jèrri, av-'ous participé au sujet d' la proposition à la députée Miller d'êrtouônner à installer 9 sénateurs en réduithant un député dans chatchun des 9 districts. Si ch'na vous intéresse d'un bord ou d'l'aut', faites seux d'contacter vot' député d'vant lé jour dé débat lé 18 du mais d'Mar.

Et bein bouonnes gens en v'là assez pouor achteu et chutte semaine, m'ercie pour m'aver écouté à matîn.

Restez sauf et à la préchaine.